



KENYATAAN AKHBAR

**KETUA SETIAUSAHA
KEMENTERIAN KESIHATAN MALAYSIA**

ISU KLINIK KESIHATAN LONG BUSANG, BELAGA, SARAWAK

Kementerian Kesihatan Malaysia (KKM) ingin memberikan penjelasan berkenaan gambar yang dikatakan sebagai Klinik Kesihatan Long Busang, Belaga di Sarawak yang menjadi viral di dalam media sosial baru-baru ini.

Adalah dimaklumkan bahawa pernyataan yang menyatakan bangunan kayu yang dipamerkan adalah Klinik Kesihatan Long Busang, Belaga dibina dengan menggunakan peruntukan yang diluluskan oleh Kerajaan sebanyak RM3 juta adalah tidak betul dan tidak benar. Bangunan tersebut didirikan secara bergotong-royong oleh penduduk tempatan dengan sokongan padu oleh pemimpin tempatan serta Pemuda Barisan Nasional (BN), dan disempurnakan oleh Menteri Belia dan Sukan, Yang Berhormat Khairy Jamaluddin sempena Program Pemuda BN Untuk Masyarakat di Long Busang, Belaga pada 24 hingga 27 September 2015.

Namun begitu, pada masa yang sama, satu Projek Pembinaan Klinik Kesihatan Long Busang dengan Kuarters, Belaga telah diluluskan oleh Unit Perancang Ekonomi di bawah *Rolling Plan* Ke-4, Rancangan Malaysia Ke-10 pada tahun 2015 dengan jumlah peruntukan sebanyak RM3 juta. Jabatan Kerja Raya Sarawak (JKR Sarawak) telah dilantik

sebagai Agensi Pelaksana bagi projek ini. Berdasarkan maklum balas pihak JKR Sarawak, kerja-kerja survei dan topografi telah selesai dijalankan di atas tapak projek pada awal tahun 2016. Di samping itu, rekabentuk skematik klinik serta pelan susun atur tapak sedang giat dijalankan. Kerja-kerja tersebut mengambil masa memandangkan tapak projek adalah jauh di kawasan pedalaman negeri Sarawak. Sebagaimana sedia maklum, Long Busang merupakan kawasan penempatan berkelompok paling terpencil dalam kawasan Belaga, dan perjalanan menggunakan jalan darat serta sungai. Seterusnya, lawatan tapak dijangka akan diadakan oleh JKR Sarawak pada bulan April 2016. Projek Pembinaan Klinik Kesihatan Long Busang dengan Kuarters, Belaga dijangka hanya akan dapat disiapkan pada awal tahun 2018.

Bagi menjayakan pengoperasian di bangunan kayu yang dibina secara gotong royong, sebagai sebuah klinik sementara, KKM melalui Jabatan Kesihatan Negeri (JKN) Sarawak telah meluluskan sejumlah peruntukan bagi tujuan perolehan peralatan perubatan dan bukan perubatan untuk digunakan di klinik sementara tersebut. Adalah diharapkan melalui usaha-usaha yang sedang dilaksanakan, penduduk tempatan sekitar Long Busang akan mendapat manfaat perkhidmatan kesihatan yang disediakan di bangunan kayu tersebut, sementara klinik kesihatan baharu yang sedang dirancangkan, dapat disiapkan kelak.

**DATUK DR. CHEN CHAW MIN
KETUA SETIAUSAHA
KEMENTERIAN KESIHATAN MALAYSIA
18 MAC 2016**